





■ МЕРЕЙ

ТАҒДЫР МАҒАН БҰЛ АЗАМАТПЕН БІРГЕ ҚЫЗМЕТ ЖАСАУДЫ, ӨМІР ТӘЖІРИБЕСІН ҮЙРЕНУ МҮМКІНДІГІН СЫЙЛАПТЫ. АРАЛ АУДАНЫН ОН ЖЫЛДАЙ БАСҚАРҒАНЫНДА, СОНЫҢ СЕГІЗ ЖЫЛДАЙ УАҚЫТЫНДА БІРГЕ БОЛДЫҚ. ЖАМАНДЫ-ЖАҚСЫЛЫ ҚОСШЫЛЫҒЫНДА ЖҮРІП, ҚУАНЫШТЫ ДА, ҚИЫНДЫҚТЫ ДА БІРГЕ БӨЛІСТІК. МЕМЛЕКЕТТІК ҚЫЗМЕТТЕ БАСШЫ ӘРІ ҰСТАЗ БОЛА БІЛГЕН, ӨЗІМ АҒА ТҮТҚАН АЗАМАТ ТУРАЛЫ, ОНЫҢ ӨНЕГЕЛІ ЖОЛДАРЫНДА КӨРГЕН-БІЛГЕНДЕРІМ МЕН ОЙҒА ТҮЙГЕНДЕРІМДІ ЖАЗҒАНДЫ ЖӨН КӨРДІМ.

ТАҒЫЛЫМҒА  
ТОЛЫ  
ЖЫЛДАР  
МЕН  
ЖОЛДАР



2006 жылдың 9 маусымында Аманөткел ауылдық округінің әкімі қызметіне тағайындалған сәттен бастап, зейнеткерлікке шыққанша, 2013 жылдың ақпан айына дейін қызметтес болдық. Өлі күнге дейін ол кісімен байланысым үзілген жоқ. Кейде үлкен басымен өзі телефон соғып, қуанышты сәттерімізді жібермей құттықтап жататыны да бар.

тәрбиелейтін басшы болды. «Мұхтар келешек әкімі болады», – деп оған сенім артатынын талай көрдік те. Мұхтар Әуесұлы сол кезде аппарат басшысы болатын, соған сай үлкен жауапкершілік жүктеп, жұмыстың ауыр салмағын да артып отыратын. Бір сөзбен айтқанда, ол Нәжмадин Мұсабаевтың мектебінде он жылға жақын шырдалып, әкімшілік басқару саласында пісіп жетілді. Нәжіжесі белгілі, Мұхтар Әуесұлы ұстазының сенімін ақтап Арал, Қазалы аудандарын сегіз жыл абыроймен басқарып, бүгінде ауыл шаруашылығы министрлігіне қарасты бір департаментті басқарып отыр. Сенімге не болу ауыр жүк болумен қатар, оны алып жүрудің салмағы тіпті де зіл батпан. Ең бастысы, сенімнің ақталғаны, ықылас-пейілінің ортаймағандығы дер едім. Бұл мысал тек Арал ауданындағы кадрлық мәселе ғана. Қазалы мен Жанақорғанды немесе Қызылорда қаласы және облыс әкімінің бірінші орынбасары қызметін атқарған кезде тәрбиелеген шәкірттері қаншама. Осының бәріне қажыр мен қайрат, төзім мен сабыр қажет екені белгілі.

Бірге қызметтес болған жылдарда бір байқағаным – ол кісі өзі тағайындаған кадрларды қызғыштай қорып, қолынан келгенше қорғап бағатын еді. Себебі қай округ, қала болсын, ел ішінде алуан түрлі пікірлердің болатыны белгілі. Қай жерде қандай пікірлер мен мәселелердің барын алдын-ала зерттеп, соған сәйкес жауабын дайындап жүруге машықтанған жан. Ең бастысы, адамның жан дүниесі мен ниетін аяқасты туындаған жағдайдың өзінде зердесінен тез өткізіп үйренген және үйлестіре білетін психолог бола білді. Ауылдық округ әкімдеріне сын садағы бағытталған сәттерде қәдімгі «майдан қыл суырмайды» тігісін жатқызып, азаматтарды үстіне су тигізбей алып шығатын. Мұндай сәттерде мәселе көтерген адамның өзі ойынан жанылып қалатын-ды. Мұндайда: «ағалар, мен жаңадан қызметке кіріскен сарыауыз балапан әкім емеспін. Өзім қойған басшыны қашан өзінің іс-әрекеттерінен өзі зардап шегетін жағдайға жеткенінше қорғау міндетім. Сондықтан маған ретсіз әңгіме айтпай-ақ қойсаңыздар» деген сөздерінің куәсімін. Нәжмадин бойындағы осындай қасиетіне өзгелер қызға қарап, құрметтейтін еді.

Нәжмадин Түрікпенұлына тән қасиеттердің бірі, өзі тағайындаған кадрларды мүмкіндігінше орнынан қозғамай, жасы келгенде зейнеткерлікке абыроймен шығарып салып, олардың өмірлік тәжірибелерін одан кейін де пайдалануға тырысатын еді.

Ұзақ жылдар Жаксықылш кентінің әкімі болып қызмет атқарған Нағашыбай Әуесханов ағамыз 2007 жылы аяқастынан қызметінен босатылатын болды. Себебі жыл аяқталар тұста СТК-ға бөлінген қаржыны игеру керек деген желеумен жұмсалған қаражаттың әлегі. Жұмсалды деген аты болмаса кент әкімінің ешқандай кінәсі де жоқ. Тәртіптік кеңестің шешімі келген сәтте, аудан әкімі Н. Мұсабаев әріптесі Н. Әуесхановқа: «мен тәртіптік кеңестің шешімін орындауға міндеттімін, амалым жоқ. Саған беретін кеңесім ізден, арыздан. Менің саған көмегім өз аузыңнан «мен болдым» деген сөз шықпайынша, орнында адам тағайындамаймын», – дейді. Мәселе жеті айға созылды, Жоғарғы соттың шешімі шығып, ағамыз ақталды. Жеті айға дейін бос тұрған лауазымға Н. Әуесханов қайта тағайындалды. Бұдан кейін бірнеше жыл қызметін жалғастырып, зейнет жасына жетіп абыроймен құрметті еңбек демалысына шығып көңілі жайланды. «Жаксыдан шарапат» деген осы болар.

2012 жылы Арал-Сарыбұлақ топтық су құбырына байланысты үлкен мәселе пайда болды. Тозығы жеткен су құбырлары кез келген жерден жарылып, Арал мен Қазалыға шілінгір шілденің ми қайнатар ыстығында ауызсу жетпей жатты. Облыстан келетін көмек те дер кезінде бола қоймай, аудан бюджетінің шамасы келмеді. Сол бір қиын сәтте жағдайды тиісті жеріне жеткізіп, қаржысын да, мердігерді де бір мезгілде шешуге барын салған қажырлы еңбегінің арқасында екі аудан халқын ауызсу қиындығынан құтқарды.

Сол тұста су ресурстары комитетінің төрағасы И. Әбішев Аралға келіп, Қосамандағы жағдайды көзімен көріп, тиісті көмегін жасады. Осының негізінде Арал мен Қазалы ауданында ауызсу мәселесі шешімін тапты. Жұмысты ұйымдастыра біліп, дер кезінде берілген көмектерді тиімді пайдалана білу Нәжмадин Түрікпенұлының іскерлігі еді.

Сол кезеңдерде Арал қаласының абаттандырылуына байланысты көптеген жұмыс атқарылды. Қаланың шағын аудандарында демалыс орындары салынып, гүлзарлар жасалды, қаншама құрылыс жұмысы жүргізілді. Мұның бәрі айтуға оңай. Сол біткен жұмыстарды аралап көруге күндіз уақыты болмаса, кешкі, түнгі мезгілдерде барып көретін. Көңілінен шықса, қуанып, келесі жұмысқа құлшына кірісетін.

Тыным таппайтын ағамыз зейнет демалысына шықса да, аудан мен облыс тұрғындарының әлеуметтік-

экономикалық мәселелеріне үн қосып, қоғамдық-саяси өмірге белсене араласып келеді. Ұстазы, марқұм Сейітбек Шаухамановтың қиын-қыстау уақытта ел тізгінін ұстағанын, ұйымдастырушылық қабілеті мен іскерлігін, кадрлардың тепе-теңдігін сақтаудағы ұстанымдарын кездескен сәттерінде біздерге айтып отырудан жалығып көрген емес. Ең бастысы, елдің ауызбіршілігін сақтай біліп, халықты нарықтық экономика талаптарына бейімдей алғандығын, осының нәтижесінде тұрмыс-тіршіліктерінің бірте-бірте дұрыс жолға қойылғанын, бір сөзбен айтқанда, ұстазының елге еткен еңбегін кейінгі ұрпаққа жеткізуді парыз санайды.

Осындай тағылымды тірліктерімен қатар Жалаңтөс баһадүр қорын басқарып ізгілікті, имандылықты дәрiптеумен қатар, өнер иелеріне қолдау жасап келеді. Оның айғағы есімі елге танымал әнші, сазгер Укітай Ераниязтың Жалаңтөс баһадүр атындағы қор медалімен, белгілі жыршы Марат Сүгірбаевты Құрмет грамотасымен марапаттап, Сыр топырағынан шыққан таланттыларға демеу көрсетіп келеді. Бүгінде Нәжмадин ағамыз 75 жасқа толып отыр. Елге сыйлы азаматтың тағылымға толы жылдары, жүріп өткен жолы кейінгі буынға үлгі боларлықтай.

Тәнірберген ДӘРМЕНОВ, өлкетанушы.

Қоғамдағы этникалық бірегейленудің кейбір өзекті мәселелері

Этникалық бірегейлену жеке тұлғаның қалыптасуындағы негізгі құрамдастардың бірі болып саналады. Жеке тұлғаның белгілі бір топқа мүшелігі дербес көзқарастардан алдын ала анықталып, айрықша топтық сипатқа ие. Қазіргі әлем – этникалық топтар әлемі. Түсінікті саяси, мәдени, тарихи, әлеуметтік және басқа да белгілері бойынша мүлдем басқа адамдар топтарының «конгломераты» ретінде белгілеуге болады. Этникалық айырмашылықтардың осы түрі тәжірибеде бір мемлекеттің құрамындағы бірнеше этностардың үйлесімді және дағдарыссыз өмірін көрсетінін атап өткен жөн. Дегенмен кез келген этникалық бірегейлену қоғамға қайітті жасырын қайшылықтар мен қақтығыстар әкелуі мүмкін. Бұл этникалық бірегейлену мәселесінің өзекті екендігін білдіреді. Бұл мәселелерді түсіну қазіргі заманғы мемлекеттер мен заманауи әлемнің қарқынды дамуы үшін маңызды.

Этникалық қатыстылық пен этникалық бірегейлену туралы әлеуметтік ғылым теорияларының кеңінен таралуы елеулі концептуалды және эмпирикалық жұмыстар тудырды. Этникалық бірегейлену мен оның негіздерін түсінудің ең танымал теориялық тәсілдері мен шеңберлерін әлеуметтік бірегейлік теориялары, модернизация теориялары және примордиализм құрайды. Бұл теориялар мен түсіндірмелер этникалық бірегейленуді ұғынуға пайдалы теориялық бағдар берді.

Басқа теориялардан ерекшеленетін әлеуметтік бірегейлік теориясы дербес этникалық бірегейлену бастапқы сипатты қабылдайтындықпен ерекшеленеді. Бұл теорияда этникалық шекаралардың қорғаныстық қалыптасуы кең таралған. Азаматтар өз топтарының мүддесіне бейтараптықпен қараса да, басқа топтарға қарағанда тартымды екенін түсіндіреді. Демек, әлеуметтік бірегейлік теориясы ішкі қабылдау және бейтараптықпен өзара әрекеттесу арқылы өздерінің әлеуметтік бірегейленуін құрады идеясына негізделеді. Модернизация теориясы қоғамдағы күрделі кала өмірі, әлеуметтік байланыстардың артуы, этносаралық неке, электронды БАҚ және көлік пен байланыстың заманауи түрлері этникалық бірегейлену маңыздылығын төмендететінін айтады. Теориядағы түсініктерге сәйкес, бірегейлік құлдырайды және қоғамдағы түйінділігі азаяды. Зерттеушілердің пікірінше, модернизация процесі этникалық бірегейлену ықпалы әлсіретіп, жаңа үстем бірлескен бірегейлікке басымдық береді. Примордиализм жеке этникалық бірегейленудің қайнар көздері мен мазмұнын биологиялық тұрғыда негізделген және мәні бойынша өзгермейтін факторлар нәтижесі ретінде бейнелейді. Осы көзқарасқа сәйкес, дербес этникалық бірегейлік өткен тәжірибелерге сүйенеді және өмір сүрудің биологиялық негізделген мұқтаждық талаптарына тіреледі.

Этникалық санамен дербес жұмыс істеудің гетерогенді түрлері мен құралдары білім беру тәжірибесінде кездеседі. Ұстаздардың шығармашылық әлеуетін оқушылар мен студенттердің интерактивті өзара әрекеттесуі жүйесін құру, мәдени мұрамен жағымды сәйкестендіру үшін қолдануға болады. Тарихи дамуымыздың қазіргі кезеңінде ұлттарлық қарым-қатынас, аралас неке мәселесі, ұлттық-этникалық бірегейлікті анықтау барысында өскелең ұрпақ тәрбиесімен айналысатын орта мектеп пен жоғары мектеп, ғалымдар алдынан шығып отыр. Бұл тұста мәселеге қатысты негізгі ұғымдарды анықтау ең алдымен қоғамдық өмірдегі маңыздылығын туындайды. Сондықтан ұлттық-этникалық мәселелерді шешудің ақыды тәсілдері туралы көбірек ойлануымыз қажет.

Этникалық бірегейленуге саяси ғылымдарда көп назар аударылатынына қарамастан, әлеуметтану, демография, мәдениеттану және экономика салаларындағы зерттеулерді біріктіретін понаралық тәсілден ғылымдағы көптеген ашық сұрақтарға жауаптар алуға болады. Осы жауаптар ерекше назар аударатын кейбір негізгі мәселелер мен болашақ бағыттарды анықтайды. Мәселен, этникалық бірегейлену мәселелерінде аз көңіл бөлінетін өмірлік цикл тәсілі азаматтар тәжірибесі уақыт өте келе этникалық бірегейлікті қалай өзгеретінін айшықтай алады. Ғылымдағы тереңдетілген сұхбат қазіргі ұлттық шарттарда азаматтардың бірегейленуіне әсерін дәйектеп, тұлғалық бірегейлік вариацияларын айқындайды. Сонымен бірге ретроспективті тәсілді қолдану арқылы өзгерістер ықпалын зерттеуімізге болады.

Жоғарыда аталған мәселелерге сәйкес, қазіргі қоғамдағы этникалық бірегейленудің негізгі мәселелері ұлттың саяси және әлеуметтік қауымдастық ретінде бірігуі процесі арасындағы түсініктермен байланысты. Қоғамда өмір сүретін түрлі топтардың бірігуі процесінің күшеюі қоғамның жіктелу деңгейінің жоғарылауын көрсетеді. Бұл мәселелердің өмірдің түрлі аспектілерінде дамуы этникалық бірегейлікті қазіргі жеке тұлғаның және тұтастай алғанда қоғамның сүбелі элементі екендігін бекітуге мүмкіндік береді. Жеке адамдардың этникалық бірегейленуі қалыптасқан саяси және этникалық мұраны көрсетуге байланысты бірегейлік қазіргі өмірде құнды құбылыс екенін танытып отыр.

Мұрат НАСИМОВ,

саяси ғылымдардың кандидаты, қауымдастырылған профессор, Қорқыт ата атындағы Қызылорда университеті философия және әлеуметтік-гуманитарлық пәндер секциясының қауымдастырылған профессоры

